

FREDERICI RUYSCHII

Med. Doctor. Anatomes & Botanices Professoris, Academiae Caesareae Curioforum Collegae, nec non Regiae Societatis Anglicanae Membri,

CURÆ POSTERIORES,

SEU

THESAURUS
ANATOMICUS
OMNIUM PRÆCEDENTIVM
MAXIMUS:

Cum Figuris æneis.



AMSTELODAMI,

Apud JANSONIO-WAESBERGIOS.
MDCCXXIV.

AUGUSTISSIMO
POTENTISSIMO

ATQUE

INVICTISSIMO

C Z A R O

PETRO ALEXIOWITZIO,

MAGNÆ RUSSIÆ

IMPERATORI, &c. &c. &c. &c.



Ostremos laborum meorum fructus
Per longam ætatis seriem quodammodo maturatos ;
nonnisi

AUGUSTISSIMO NOMINI TUO GLORIOSISSIMÆ
CÆSAR

Inscribendos censui,

Ratus si primitiæ ab Æthnicis, ac imperfecta laborum
veluti rudimenta, ipso adhuc in famine nu-
minibus ipsis obferebantur, Majori equidem
jure posteriores absoluti artificii conatus

HEROICÆ IMPERIALIS TUE MAJESTATIS VIR-
TUTI

Dicari posse.

* 2

Po-

POTENTISSIMO itaque IMMORTALIS NOMINIS
SUI PATROCINIO vallatus Thesaurum meum
Maximum

Seu laborum omnium per tot annorum spatium exant-
latorum, & ad res Physico-Anatomicas illustran-
das novissime detectorum Epilogum Publico
communicandum aggredior;

Eaque præcipue spe firmissima fretus.

GLORIOSISSIMI NOMINIS TUI AMPLITUDINEM
Postremis hisce laboribus meis perennandis mo-
mentum maximum adjecturam, nec FULGEN-
TISSIMOS TUÆ MAJESTATIS RADIOS
sudoribus hisce Illustrandis unquam
defuturos, quorum Adolescentes
partim conatus ante septen-
nium

OBTUTU SUO CLEMENTISSIMO
dignata fuit.

Prædilectum veluti gravium annorum Benjaminum
TUÆ MAJESTATI consecro,

Illud tantum cum universo Terrarum Orbe in TUÆ
GLORIÆ SECURITATEM fatendo:

TIBI scilicet Victoriis æque ac litteris instituendis
Nato non solum ex armis præsentem RUSSICI
IMPERII felicitatem sed & ex omnigena
scientiarum introductarum culturâ Fu-
turam perpetuitatem deberi.

Cæsareæ Regiæque Majestatis Tue

Clientum infimus

FREDERICUS RUYSCHIUS.

P R Æ F A T I O.



*Q*uod me hic denuo prodire videas, Benevole Lector, in tam provectâ aetate, scias velim, me hisce diebus per Clementissimi Creatoris gratiam, varia iterum detexisse, quæ libenter ante obitum, orbi literato communicarem sub nomine curarum posteriarum, sive Thesauri Anatomici omnium præcedentium maximi: in quo ultra ducenta & viginti objecta conspiciuntur: porro inter illa multa oculos incurrunt, quæ nunquam antea ab aliis descripta videram.

Convertamus primò oculos, & videamus quàm mirandum in modum Omnipotens DEUS nobis visui exposuit veram ramorum venæ portæ constitutionem: hujus rami quamvis emergant ex eodem fonte vel trunco, attamen multum inter se differunt, id quod nemo hactenus per figuras nobis exhibuit.

O! Quàm mirifice occurrunt nobis jam dicti rami venæ portæ in hepate: in eo representant prorsus aliam constitutionem, quam in intestinis & in pancreate, sicuti in hoc opere videre licet, ut & in Decad. III. Adversar.

In hac congerie objectorum indigitatur quoque, quanta sit discretio inter reptatum & constitutionem ramorum venæ portæ & venæ cavæ, non solum in hepate, verum etiam per intestina: an, ad peculiare quid obervandum? facile calculum apponerem huic assertioni.

P R Æ F A T I O.

Porrò, perluſtrari hic poteſt, ramos vaſorum ſanguineorum per meſenterium diſſeminatorum, tam ſubtiles ramuſculos exſerere, ut telam aranearum, variis locis, ſuperent: id quod per iconem hic quoque reſepræſento. Diſta vafa meſenterica (meſenterio relicto) cum pervenerint ad inteſtina, aliam adoptant naturam circa illorum reptatum, qui revera admirandus eſt.

Uterius, cum inter Scriptores ſatis ſuperque diſputatum ſit, ſuper verâ exiſtentiâ vel conſtitutione lienis, quicumque congregationem hujus Theſauri dignetur perluſtrare, quid ſit de veritate hujus rei, luculenter ſatis apparebit.

Inter illa, qua contra naturæ leges in hoc Theſauro occurrunt, haud inſimum locum occupat fruſtum offis femoris humani, prodigioſæ craſſitudinis: nam in ſtatu naturali, vulgò calami ſcriptorii, præter propter, craſſitudinem obtinet, illud verò pollicem hominis ſuperat; præterea in totum ſerè cellulolum factum, an ab affluente humore & anafarcâ inveterata?

Omnem litem dirimere poterimus (ut ſuſtineo) quid judicandum ſit, de ita diſtis glandulis cutaneis, quas pro papillis cutaneis, & tactus instrumentis, habeo.

Qui cupidus eſt videndi corticem cerebri vaſculoſum eſſe, & neutiquam ex oblongo-rotundis corpusculis, ut & tunicam novam in oculo, quam filius meus Henricus denominavit Ruſſchianam, hic datur occaſio.

Quid

P R Æ F A T I O.

Quid sit de cryptis Boerhaavianis, qua scriptoribus glandulæ audiunt, in nullo animali luculentius eas offendi, quam in balenæ intestinis, ea propter illis quoque locum concessi in hoc Thesaurο.

Ne quis postea dubitaret de vera existentia corporis reticularis Malpighii, sub cuticula siti, reperitur in hac congregatione non solum in Europæis, verum etiam in Æthiope, semi-Æthiope, ut & in balena, quod litem & controversiam dirimit. Interim, hallucinantur quoque qui statuunt dictum corpus reticulare, non ubique sub epidermide inveniri in corpore humano, contrarium hic visui expono; & ne quis dubitet de veritate corporis reticularis supra dicti, huncce Thesaurum condecoravi frusto epidermidis, cui adhucdum adheret ab unâ parte corporis reticularis portio, ab alterâ parte, epidermis ab eo viduata est. Inter hæc omnia comparent quoque papillæ, corpus reticulare, ut & epithelia lingua balenæ.

Quâ in re differt embryo humanus, à fœtu humano, hic quoque videre est. Hisce adjunxi aliquot fœtus humanos, albicantes, diversæ ætatis, ut & sceleta duo albicantia fœtuum humanorum decumbentium in tumbris ex ligno Indico pretioso confectis; idque super matracia ex serico cœruleo fabricatâ.

Olim quidem visui exposui insolentes exostoses, hic quod magis mirandum, visui occurrit exodontosis, vel
ex-

P R Æ F A T I O.

excreſcentia dentis Elephantis , & quidem in ejus cavo reperta: hujus iconem propter admirandam formam , in ſequenti Decade IV. viſui exponere conabor.

Inter Anatomica reperiuntur quoque varia Botanica , inter qua varia exiſtunt , qua Analogiam habent cum viſceribus noſtris , fructus puto , Pyra , Pruna , Poma Armeniaca &c. qua in ſceleta (ut ita loquar) redegi & adjunxi , ut ineffabilia & divina DEI opera conſpiciantur , pondusque afferrent Systemati noſtro circa conſtitutionem & uſum vaſorum.

Præter hæc omnia ditatur quoque maximus noſter Theſaurus pyxidibus aliquot , qua herbas floresque rariores continent , ditanturque papilionibus & aliis inſectis ex utraque Indiâ præſertim allatis: ſuntque tales pyxides mihi tanquam herbaria viva , in quibus flores naturalem formam conſervant , coloremque per multos annos retinent. Herbaria viva , qua hætenus vidi apud alios , & ſicuti ipſemet facere aſſoleo , omnia inter chartas exſiccantur , & comprimuntur , quo factò , recedunt à naturali conſtitutione; hic è contra conſpiciuntur , ceu in ſtatu vivo , id quod oculos allicit. Ex ſupra abundanti foret plura rariores hic recensere , qua in hoc Theſauro nobis occurrunt , ſed ex ungue , uti in proverbio eſt , noſcitur leo.

C U R Æ

A D
VIRUM CELEBERRIMUM
FREDERICUM RUYSCHIUM,

Med. Doct. Anat. & Botan. Professore. Acad. Cæs.
Cur. Collegam: Reg. Soc. Angl. membrum.

Cum Anno Æt. 87.

CURAS POSTERIORES

Ederet.



*S*iccine præstantes auget nova cura labores,
Posterior quamvis tempore, mole prior?
Nominibusque tibi, RUYSCHI clarissime, multis
Devincis doctos nunc, velut ante, viros?
Latere, abstrusos quisquis penetrare recessus,
Largaque natura munera nosse cupis;
Pandit, in occultis fuerant qua tecta latebris,
Et reseat clausas RUYSCHIUS arte fores.
I nunc! Pyramidum jactes portenta, labores
Exsuperat tenuis pagina, Memphi, tuos.
Quisquis eris, merito qui tot præclara stupebis,
Que locuples oculis offeret arca tuis;

* *

Quis-

*Quisquis eris, venerare DEUM, miracula dirves
Qui tot in exiguo corpore summa creat;
Et gratare seni, qui tot miracula magni
Numinis auxilio conspicienda dedit.
Felix! muneribus qui sic ditaverit orbem,
Et servet nomen post sua fata suum.
Gratulor annosam, RUYSCI venerande, senectam
Gratulor exactos, non sine laude, dies;
Et, quanquam diris debebis cedere fatis,
Magne vir, innumeros vivere digne dies,
Pro meritis, medicum tibi quis obstrinxeris orbem,
Vives, quantumvis mortuus, usque tamen.*

JOANNES OOSTERDYK SCHACHT.

CURÆ POSTERIORES

THE SAURUS

ANATOMICUS,

OMNIUM PRÆCEDENTIUM MAXIMUS.

A S S E R I.

N. I.



Embryon humanus magnitudine semi-unciæ, dependens à funiculo umbilicali ope capilli, in phiala liquore repleta.

N. I I.

Fœtus humanus aliquanto major, itidem in phiala liquore repleta: albus est, & quasi hodie natus, extremitates corporis perfectæ sunt, quibus prior caret, ea propter fœtus à me audit.

N. I I I.

Phiala ut supra, continens fœtum humanum, digiti circiter longitudine, dependentem à funiculo umbilicali; estque albi coloris, tanquam recens natus.

N. I V.

Phiala, liquore repleta, in qua continetur fœtus humanus; trium circiter, à gestatione mensium, repræsentans sexum masculinum, cum contra fœminini sit, quod ordinariò ea ætate, non contra naturæ leges est; estque etiam albissimus, & quasi hodie in lucem editus.

N. V.

Phiala, liquore repleta, & in ea fœtus humanus quatuor circiter mensium præter propter (meo iudicio) pulcher & albus: huic appositæ sunt duæ portiones cerebri mulieris, infanticidæ, quæ fœtum suum suffocaverat, abieceratque in latrinam.

N. V I.

Phiala liquore repleta, & in ea portio epidermidis & corporis reticularis Malpighii, ex Æthiopia: & ut illa melius in conspectum

A

tum

2 THE SAURUS ANATOMICUS

ctum venient, ramum rarissimi cardui minimi *Alpini* (qui obiectum ad vitri parietem premit) addidi.

N. VII.

Phiala, ut supra, & in ea portio epidermidis & corporis reticularis ex semi-Æthiopissa, in ea videre est, corpus reticulare dilutius nigredine præditum.

N. VIII.

Phiala ut supra, & in ea portio epidermidis & corporis reticularis ex Europæa, quæ ejusdem fere est albedinis cum epidermide. Huic aditus ramus plantæ Americanæ portulacæ folio.

N. IX.

Phiala ut supra, in qua continetur Europæi epidermis & corpus reticulare Malpighii, à calore solis, corpus reticulare subflavum factum: id quod semper fieri videmus à calore dicto.

N. X.

Pedamentum, & supra illud capitium (Belgice *een Callottie*) confectum è cute capitis infantis, cujus arteriæ sunt repletæ, unde totum objectum summa rubedine tinctum est; porro est pulchræ notæ.

N. XI.

Pedamentum exiguum, cui imposita portio cutis faciei juvenis, cujus vasa sunt repleta, ea propter summo opere rubra existens.

N. XII.

Pedamentum exiguum, cui itidem imposita portio cutis faciei mulieris, eodem modo præparata.

N. XIII.

Pedamentum, cui impositum aplustre è cute humanâ confectum, in quo multæ, imò innumeræ papillæ cutaneæ visuntur, quæ perperam pro glandulis cutaneis habentur à scriptoribus.

N. XIV.

Pedamentum ut supra, continens aplustre confectum è cute hominis adulti, è cujus superficie papillæ cutaneæ eminent, inftar arenularum.

N. XV.

Pedamentum, cui impositum est aplustre è cute capitis, pilis subflavis obsita, huic remanet adhucdum tunica cellulosa arteriis repletis perfusa, quæ diverso gaudent reptatu ab iis, quæ per cutem reptant.

N. XVI.

Aplustre confectum, è cute foetus humani, cujus arteriæ sunt in-

infarctæ; epidermide, corpore reticulari, & tunica cellulosa, a vulsis, in conspectum veniunt arteriæ, quas ab utraque facie cutis visas, eundem reptatum obtinere conspiciamus; contra, si quid tunicæ cellulosæ (per quam plurimæ quoque disseminantur arteriæ) remanserit, facile illud imponeret perlustrantibus, id quod semel contigisse vidi, cum mihi demonstrabatur cutis segmentum cui adhuc adhærebat tantillum tunicæ cellulosæ. Præterea observandum in hoc objecto punctum nigrum quod indicat papillas cutaneas, quæ oculis armatis visæ, tanquam variolas egregie referunt.

N. X V I I.

Pedamentum, cui impositum frustum cutis foetus humani recens nati, cujus arteriæ sunt repletæ, unde summa est rubedine, quantumvis admodum sit tenue objectum.

N. X V I I I.

Pedamentum ut supra, segmentum vel lamella transversa pectoris pueri vel infantis, cui adhuc remanserunt connexa cor & pulmo: in hoc objecto conspicitur verum esse, quod sæpius in prælectionibus ac demonstrationibus publicis dixi, sub sternone nullam reperiri cavitatem, quantumvis varii auctores in eo hallucinati sint: omnia viscera pectoris tam arte & nitide inter se sita sunt, ut visu mirum sit. Seta bicolor & major indigitat auriculam dextram: altera seta minor, cor ipsum; tertia & minima auriculam sinistram. Præterea hic observandum omnia adhuc naturalem retinere situm, & magnitudinem, idque colore rubicundo, propter vasorum repletionem.

N. X I X.

Pedamentum, cui imposita maxima cordis portio cujusdam infantici, ancillæ, quæ foetum vivum rejecerat in latrinam; hæc autem in carcere detenta & ibidem denata, à me publice fuit dissecta.

Seta bicolor longissima demonstrat & quidem luculenter, ceraceam materiam rubedine præditam roris instar exitum sibi quæsisisse per ultimas extremitates arteriolarum, quæ tomenti instar tenues sunt.

Seta brevior & bicolor notat vasa coronaria. Tertia & minima auriculam sinistram.

Hoc objectum optimæ notæ & eminentiæ est.

4 T H E S A U R U S A N A T O M I C U S

N. X X.

Phiala, in liquore continens renem foetus humani immaturi rubicundissimum, propter repletionem arteriæ. Notandum utramque membranam esse ablatam.

N. X X I.

Phiala magna, in liquore continens crus, cum pede extremo, eorum muscoli separati sunt ex juvene, septem circiter annorum; musculi naturalem colorem servant propter arteriarum repletionem: suntque muscoli egregie separati.

N. X X I I.

Phiala magna in liquore continens caput pueri, sex circiter annos nati, viventis capitis speciem representans: suntque masæ, nasus, ut & labia levi rubedine perfusa, nullæ quoque rugæ in facie reperiuntur. Ita ut adhucdum vivere videatur. Ablata superiore parte capitis, in conspectum veniunt vasa sanguinea repleta post cerebri ablationem.

N. X X I I I.

Pedamentum, supra illud glandula parotis è vitulo, recens nato. Repletio facta est per arteriam; sed verò, quanta discrepantia, inter constitutionem harum arteriolarum, & illarum, quæ reperiuntur in glandulis mesenterii? quemadmodum representavi in opusculo de glandulis, mirum visum.

N. X X I V.

Phiala in liquore conservans uterum muliebrem, cujus fundus non solum, verum etiam cervix, secundum longitudinem aperta sunt, ut facies eorum visui occurreret, & sic in eo, cervice aperta, visui occurrunt chordæ plurimæ crassæ; hunc in finem aperta tenetur cervix spinâ transversim sitâ. Hisce annectuntur adhucdum Tubæ & ovaria, quorum unum ovarium ejusque tuba bene sunt constituta; alterum verò contra naturæ leges in aliud est mutatum & tubæ connatum.

N. X X V.

Phiala sicca, & in ea, avicula paradisiacæ, ex albo & nigro variegata, cauda duabus pennis longissimis prædita. Herm. Catal. mus. Waiuhora Zeylan. id est Gossypium furens (Belgicæ *Katoen dieffe*. codelatie Malab. Manucodiata cristata ex albo nigroque variata. Ray Synop. avium. Telleyeaco, gentilibus. ex hujus cauda prominent duæ pennæ longissimæ nivæ, pedibusque est instructa. Inter rarissimas recensetur aviculas, Cl. Paulus Hermannus olim Professor Lugdunensis primus fuit, qui nobis

bis occasionem dedit videndi hancce aviculam perfectissimam.

N. X X V I.

Pedamentum & supra illud superior pars capitis ossis foetus humani, arteriolæ per pericranium disseminatæ, optime sunt repletæ, ut & illæ quæ repunt per duram matrem: sinus longitudinalis ceracea materia abrupta repletus est, quia ultimi ramuli arteriolarum mihi videntur hic & illic conjuncti cum extremis venulis, sanguine repletis, simul intrarunt in dictum sinum, & hinc illa abruptio, & forsân quoque illa hallucinatio auctorum, qui solebant repletionem illam facere per arterias carotides, atramento nigro, quo factò videbant atramentum in sinum longitudinalem quoque penetrare, & sic putabant sanguinem arteriosum per arterias in corpore vivo, etiam in dictum sinum sese exonerare, quibus calculum haud appono.

N. X X V I I.

Phiala liquore referta, & in ea prunum ex carne, seu sceleton pruni, (ut ita loquar) dependens à filo, ut vasorum succosorum constitutio & reptatus luculentius in conspectum venirent, quæ vasa partim à pedicello, partim è nucleo prodeunt.

N. X X V I I I.

Phiala magna in liquore reservans segmentum transversum testiculi humani maximi, cujus vasa seminis rudimentum conficiuntia sunt confusa, & in cartilagineam substantiam redacta, eratque dictus testiculus in tantam molem excretus, ut caput foetus humani magnitudinem superaret.

N. X X I X.

Phiala in liquore continens duo objecta, quorum infimum embryon ovillus est, à capillo dependens, & hærens adhucdum proprio in liquore, in quo hæsit dum hospitaretur in utero matris; qui liquor ita transparet, ut jam luculenter visui se offerat embryon, ac si extra liquorem sese videndum exhiberet: superius objectum ovarium est, in quo conspicitur adhucdum vestigium loci, per quod ovi contentum exivit.

N. X X X.

Phiala liquore continens partes generationis puellæ.

N. X X X I.

Phiala liquore obsita, in quo reperitur minus bene, tamen dicta mola, quandoquidem veræ molæ non reperiuntur; suntque ut plurimum, nil nisi placenta, vel placentula residua post foetus vel embryonis exclusionem.

6 THESAURUS ANATOMICUS

N. XXXII.

Pedamentum, & super illud, cutis capitis hominis adulti, quæ hic nobis occurrit instar capitii (*Kalos Belgicè*) coloris rubri, propter vasorum sanguineorum repletionem. In hoc objecto videre licet, quo ritu arteriæ utriusque lateris sibi invicem occurrunt; subiectum autem est optimæ notæ.

N. XXXIII.

Phiala liquore continens segmentum intestini recti humani inversum, ut cryptæ Boerhaavianæ, ut & pori numerosissimi sese videndos exhiberent.

N. XXXIV.

Phiala in liquore conservans segmentum oculi humani, in quo luculenter visui occurrit tunica sclerotica, Ruyschiana, ut & retina, per quas tunicas arteriæ numerosissimæ sunt disseminatæ curiosissime.

N. XXXV.

Pedamentum & supra illud frustum Intestini Ilei ex juvene, hujus repletio facta per arteriam & venam.

A S S E R II.

N. XXXVI.

Phiala continens in liquore frustum tendinis musculi è balæna, cujus constitutio admiranda, sc. digitum crassus est, nec non durissimus, & indissolubilis.

N. XXXVII.

Phiala ut supra instructa frusto stomachi vitulini, in quo luculenter non solum propullulant papillæ sensui dicatæ, verum etiam earum corpus reticulare luculenter in conspectum venit.

N. XXXVIII.

Phiala ut supra, in qua continetur portio piæ matris, cujus arteriæ modicè sunt repletæ.

N. XXXIX.

Pedamentum & supra illud pilus è ventriculo vituli.

N. XL.

Phiala in liquore conservans portionem cerebelli è vitulo; hoc autem cerebellum remanserat in capite vituli per semi-annum mortui in utero vaccæ, idque absque putrefactione, attamen non sine flacciditate: dictum cerebrum ad incudem revocavi, ejusque ar-

arterias ceraceâ materiâ rubrâ replevi tam nitide, ut adhuc videri hic possit. Vacca in qua hæsit dictus vitulus mortuus, mactabatur mense Novembri, eratque obesa & bene constituta, quamvis foetu mortuo obsita, & consumta in familia Cornelii Vos, hortulani civitatis Amstelodamensis. Raritas hujus rei in eo consistit, sc. cum nihil in corpore quadrupedum neque in homine citius putredinem induat, quam cerebrum; quod cerebellum tamdiu constans manserit ad arteriolarum repletionem. vid. Histor. decad. III. Anatom. Chirurg. Medicar.

N. X L I.

Phiala liquore referta, in qua hæret sceleton pyri, nobis indicans pyra æque bene constare ex vasis succosis, sicuti in corpore humano lienem ex meris vasis sanguineis, cum extremitatibus pulposis, quibus pyra quoque gaudent.

N. X L I I.

Phiala ut supra & in ea foetus biceps columbæ.

N. X L I I I.

Phiala liquore referta, continens magnum frustum pinguedinis humanæ ita constitutum, ac si jamjam è corpore extractum esset.

N. X L I V.

Pedamentum & supra illud foetus humani hepar, cujus vasorum extremitates pulposæ ita sunt repletæ, ut inter se sint confusæ, nec ulli ramuli vasorum in conspectum prodeant. Spinula bicolor indicat venam umbilicalem, quæ adhuc aperta & ceraceâ materiâ rubrâ infarsa est. repletio facta per arteriam.

N. X L V.

Phiala liquore repleta, & in ea pia mater, cujus arteriæ sunt repletæ, ex muliere.

N. X L V I.

Phiala ut supra, in qua reperitur frustum placentæ muliebris; hujus vasa sanguinea in hydatides sunt mutata, quarum plurimæ visuntur admodum exiles, & maxima pars illarum in majorem molem sunt excretæ.

N. X L V I I.

Phiala ut supra, & in ea crus foetus recens nati cum extremo pede, vitæ speciem repræsentantis; inter digitos pedis continetur ramulus granadillæ folio tricuspide, fl. minore luteo. Tourn. flos adhuc superstes est.

N. XLVIII.

8 T H E S A U R U S A N A T O M I C U S

N. XLVIII.

Pedamentum instructum auricula foetus immaturi ovilli: arteriolæ nitide sunt repletæ, nec non peculiari reptatu dispersæ: in ea quoque tres reperiuntur aciniformes particulæ.

N. XLIX.

Phiala in liquore continens frustum longum intestini Ilei ex juvene; hujus arteriæ nitide sunt repletæ. Hic quoque in conspectum sese produnt, ita dictæ glandulæ Peyeri, (potius cryptæ Boerh.) solitariae (post intestini inversionem) & quod considerandum, hæ ita dictæ glandulæ extra superficiem, quæ proprie tunica intima audit, propullulant.

N. L.

Phiala ut supra, in qua reservatur foetus humani brachium, vitæ speciem repræsentans, in cujus dextra continetur pyri sceleron; hujus vasis succosis extremitatibus adhuc appensæ sunt pulpositates notabiles.

N. LI.

Oculus balænæ in liquore conservatus: hujus tunica sclerotica ab unâ parte vel latere pollice digiti longe crassior; præterea circulares fibræ pupillam contrahentes luculentius, quam in homine & aliis animalibus in conspectum veniunt, idque nulla ulteriore præparatione prægressa, sed solâ incisione transversim inslituta.

N. LII.

Pedamentum & supra illud cor, & frustum pulmonis foetus humani recens nati, à matricidâ incisi.

Spinula tenerrima nigra indicat locum ubi arteria pulmonalis, & arteria magna conveniunt, & uniuntur per ductum arteriosum. Spinula bicolor demonstrat truncum arteriæ magnæ ascendentis. Spinula maxima bicolor & crassissima auriculam cordis dextram. Spina nigra obtusa & brevior auriculam sinistram. Punctum nigrum maximum, arteriam pulmonalem. Tria puncta solitaria, tres canales arteriosos sursum spectantes: duo puncta, arterias carotides. Spinulæ albicantes brevissimæ tenuissimæ arterias carotides. Spinula flocco rubro obsita subclaviam dextram. Filum sericeum, quo ligaveram portionem pulmonis ante repletionem. Spinula obtusa thymum.

N. LIII.

Pedamentum & super illud magnum segmentum intestini hominis, cujus arteriæ non solum, verum etiam venæ repletæ sunt, unde summâ conspiciuntur rubedine.

N. LIV.

N. L I V.

Phiala in liquore continens priapum vegetabilem. *Hermanni.* seu herbam canthariferam. *Rumph.* Bandura. *Ceylanenf.* Daun. *Gindi.* *Amboinenf.* vid. Ephemerid.

N. L V.

Intestina juvenis, cujus arteriæ sunt repletæ, supra pedamentum.

N. L V I.

Phiala liquore referta, & in ea vipera exigua Zeylanica vittata gesticulatrix, ad cervicem conspicillo insignita. Cobras de capelo. *Lafit.* dicta. Naia *Zeylanenf.* *Hermann.* *Mus. Zeylanic.* seu serpens Indicus coronatus diademate seu conspicillo insignitus. *Ray synops. anim.* Belgice *Brilflang*, hærens inter Epiocymum, seu cuscutam super ocymum; dicta planta est onusta semine; quod in eadem phiala visui occurrit.

N. L V I I.

Phiala in liquore reservans utramque Tunicam, sc. scleroticam & choroideam inversam, ut hæ duæ non solum, verum etiam Ruyschiana visui occurreret.

N. L V I I I.

Pedamentum, & supra illud dimidia pars thoracis infantis. Vasa per costas musculosque intercostales mirum in modum sunt repleta: corpora vertebrarum transmissarum scatent quoque particulis rubris, & quod mirum visu, membrana medullam ambiens scatet arteriolis peculiaribus, tantaque subtilitate præditis, ut non nisi tempore meridiano, cælo admodum sereno existente, in conspectum veniant, præterea spectantis oculi armati aliquandiu figendi sunt uno eodemque loco, quo sine, impossibile est, illarum reptatum videre.

N. L I X.

Segmentum pulmonis humani. repletio facta per venam pulmonalem: hinc millenæ vesiculæ pulmonales quoque sunt repletæ: hic autem occurrunt vesiculæ repletæ longè minores, quam in superiore subiecto, id factum à repletionem leniore.

N. L X.

Pedamentum, & supra illud segmentum lienis bovis, cujus arteriæ pulpositatibus ademptis, flatu repletum, exsiccatum, nobis indicat stamina lienis longius à se invicem distare, quam in liene vitulino, quandoquidem lien in majorem quidem magnitudinem excrescit, & stamina non augentur numero.

B

ASSER

A S S E R III.

N. L X I.

Phiala liquore repleta, & in illa segmentum lumborum humanorum; in quo spinalis medulla arteriolis repletis, in conspectum venit.

N. L X I I.

Phiala ut supra, in qua cor foetus humani rubicundo colore superbiens, à filo tenuissimo dependet.

N. L X I I I.

Phiala, ut supra, in qua ren pueri, cui adhuc infidet ren succenturiatus, suntque rubicundo colore præditi propter repletionem per arteriam factam.

N. L X I V.

Phiala, ut supra, segmentum Intestini llei ex juvene, cujus superficies interior villo-papillosa à me dicta, in conspectum venit, propterea quod intestinum inversum sit: estque hoc objectum rubicundissimum à repletionem per arteriam facta.

N. L X V.

Phiala ut supra, lien ex juvene, cujus arteriæ sunt repletæ.

N. L X V I.

Phiala, ut supra, epidermis & corpus reticulare rosmari, Belgice *Wairus*.

N. L X V I I.

Pedamentum & supra illud, pes cum pede extremo balsamo indurati, & rubicundissimo colore superbientes, propter repletionem per arteriam factam; è foetu recens nato.

N. L X V I I I.

Pedamentum & supra illud segmentum diaphragmatis, cum dimidia parte pericardii. Spina alba indicat segmentum diaphragmatis; nigra vero segmentum pericardii, è foetu humano; repletio facta per arteriam.

N. L X I X.

Pedamentum &c. segmentum capitis infantis, in quo occurrunt, 1^o. cutis capitis rubicundissima. 2^o. auricula rubra. 3^o. membrana dura mater cum suis arteriolis.

N. L X X.

Phiala in liquore continens penem scrotumque inversum è puero, repletio facta per arteriam. In fundo phialæ reperitur segmentum

mentum penis virilis, cujus tria corpora nerveo-spongiosa sunt repleta, ut & ramulus cum flore & fructu floris passionis curassav, hederæ hirsuto folio, fl. albo. *Par. bat. prod.* f. fl. passionis albi & reticulati. *Par. bat.* Granadillæ flore albo, fructu reticulato. *Boerhaav.*

N. L X X I.

Pedamentum instructum segmento lienis vituli in formam aplustris, cujus arteriæ sunt repletæ, harum extremitates imæ adeo sunt exiles, ut captum humanum superent.

N. L X X I I.

Pedamentum continens dimidiam partem renis humani; hujus repletio facta per venam, ut differentia appareat inter repletionem per arteriam & venam, quæ considerationem meretur.

N. L X X I I I.

Pedamentum continens aplustre confectum ex segmento Intestini Ilei ex homine adulto; hujus vasa tomenti instar finem faciunt.

N. L X X I V.

Phiala sicca, continens pilos ex atheromate omenti desumptos vid. *Historiam in Observ. meis Anatom. Chirurg. pag. 17.*

N. L X X V.

Phiala in liquore continens uterum humanum tam naturaliter conservatum, ac si hodie desumptus fuisset ex muliere.

N. L X X V I.

Pedamentum instructum hepate foetus ovilli imperfecti, repletio facta per venam umbilicalem, & hoc facto longe differt, ac si per arteriam fuisset instituta.

N. L X X V I I.

Phiala in liquore continens lienem humanum ex parte evolutum; hujus arteria repleta luculenter indicat nullas cellulas, neque fibras inesse lieni.

N. L X X V I I I.

Phiala ut supra, continens musciculum elevatorem brachii, deltoïdem; ab hujus tendine dependent ultra triginta musculorum corpuscula, quæ à se invicem curiose sunt separata, absque læsione carnositatis.

A S S E R I V .

N. L X X I X .

Pedamentum instructum brachio foetus humani balsamo indurato; per cutem vascula sanguinea adeo sunt numerosa, ut obiectum sit ruberrimo colore præditum; in manu continet & demonstrat folium quercinum, cujus pulpositate in totum fere adempta perpulchre repræsentat reticulum.

N. L X X X .

Phiala magna in liquore demonstrans maxillam humanam dentibus omnibus niveis præditam: lingua rubicundissima est, è cuius superficie eminent papillæ linguales rubicundæ; gingivarum papillæ quoque videndas sese exhibent. Præterea visui occurrit ab uno latere, cartilago mobilis, quæ processui condyliformi adhuc cohæret; repletio facta per arteriam. Supra operculum visui occurrit capitulum osseum foetus humani nitidissimum.

N. L X X X I .

Pedamentum curiosum & super illud stomachus pueri, cujus arteriæ repletæ sunt; & quod notandum, leviter replevi huncce stomachum, unde factum est ut visantur foveæ.

N. L X X X I I .

Pedamentum & supra illud sternum cum cartilaginibus costarum; repletio mirum in modum per arteriam peracta, millenæ enim in conspectum veniunt extremitates tomenti instar tenues; suntque cartilaginee transparentes.

N. L X X X I I I .

Pedamentum continens segmentum magnum mesenterii humani, cum glandulis numerosissimis, sc. majoribus, minoribus & minutissimis, quarum ultimæ visum effugiebant ante repletionem; & quod notandum, Icon huius subjecti ex parte depictus in responsione nostra de corp. glandular.

N. L X X X I V .

Pedamentum continens segmentum mesenterii ex alio homine, in eo longe pauciores inveniuntur glandulæ, obiectum attamen admodum curiosum.

N. L X X X V .

Phiala in liquore conservans frustum magnum Intestini jejuni inversi ex homine; in eo non solum arteriæ, verum etiam venæ
in

In totum sunt repletæ ad ultimum usque, unde objectum ruberrimum, & tanquam inflammatum visui occurrit. Juga, (alii valvulæ conniventes) ut & tunica villosa, (mihi nervco-villosa) clare quoque eodem colore imbuta, in conspectum veniunt.

N. L X X X V I:

Pedamentum nitidissimum & instructum hepate ex juvene, cujus repletionem peregi per arteriam magnam, & tamen totum hepar vasis sanguifluis superbit, id quod consideratione dignum esse cenfeo. Longe inter omnia, quæ præparavi jecinora agmen ducit hoc objectum, utpote, oculis armatis visum, idque cælo sereno existente, totum objectum ex meris vasis constare deprehendimus; non verò ex peculiaribus corpusculis, quæ dicuntur glandulæ: præterea, post repletionem retinuit naturalem magnitudinem, & neutiquam in majorem molem extensum. Vesicula fellea, ut & ligamentum umbilicale scatent quoque vasis sanguineis repletis.

N. L X X X V I I.

Phiala, in liquore conservans extremum pedem juvenis, cujus arteriæ sunt repletæ: in extremis digitorum nonnullæ comparent papillæ nervæ, sc. eo loco, ubi cohaeserunt unguiculis. Supra objectum visui quoque occurrit ramus Elichrysi arborei Afric. salviæ folio odorato. *Boerhaav.* & supra illa objecta occurrit pia mater adulti hominis, cujus arteriæ quoque sunt repletæ.

N. L X X X V I I I.

Phiala, ut supra, in qua conspiciuntur tibia & pes extremus vitæ speciem non solum repræsentantes, verum etiam ad amussim respondentes affectui, qui dicitur febris purpura. huic objecto affidet ramus momordicæ Zeylanicæ pampinea fronde, fructu breviori. *Tournef.*

N. L X X X I X.

Pedamentum & supra illud frustum intestini Ileihumani inversi, in quo ab inflatione valida cellulositas apparet: quæ, an pro sexta membrana intestinorum recensenda, videant Anatomici.

N. X C.

Phiala in liquore continens pueri brachium cum manu vitæ speciem exhibentia: ne autem videatur otiari, in manu continet & demonstrat arterias piæ matris ceraceâ materiâ repletas: supra operculum visui occurrit caput cardui tomentosi.

N. X C I.

Phiala in liquore continens frustum piæ matris, cui adhærent

B 3

variis

14 T H E S A U R U S A N A T O M I C U S

variis in locis vascula corticem cerebri constituentia; supra operculum hujus phialæ continetur pedamentum instructum aplustro foetus humani, cujus arteriæ sunt repletæ.

N. X C I I.

Phiala, ut supra, in qua luculentius illa apparent, quam in præcedenti.

N. X C I I I.

Phiala, ut supra, in qua multo luculentius illa in conspectum veniunt, quam in præcedentibus duobus præscriptis: huic adhuc adhærent particulæ corticis cerebri.

N. X C I V.

Phiala magna in liquore continens caput pueri, unius circiter anni; superiore capitis parte, ut & cerebro ablatis, prodit pia mater cum suis arteriis repletis. Facies ut & prolabia vitæ speciem quoque repræsentant, ita ut illud objectum maximi momenti sit. Supra operculum dicti capitis conspicitur Phiala sicca

N. X C V.

In qua continetur pedamentum, & supra illud ovulum gallinæ cum putamine duro obductum, magnitudine nucis moschatæ, inventum in ovo gallinæo vulgari: huic ovulo exiguo insidet sceleton muris, in cujus dorso osseo insidet aliud muris sceleton.

N. X C V I.

Pedamentum, cui impositus est musculus gluteus major ex juvene: repletio facta per arteriam, unde colore rubicundissimo præditus.

N. X C V I I.

Tumba exigua nitida, confecta ex ligno Indico, in ea sepelivi sceleton niveum foetus humani quatuor præter propter mensium, in cujus dextra continetur Ephemeris (vulgo *heft*) quia dictum insectum per diem vivit. Inscriptio talis est:

E A D E M, Q U Æ V I T A M D E D I T, H O R A C A R P S I T.

N. X C V I I I.

Pedamentum instructum hepate foetus humani sex circiter mensium à conceptione: repletio facta per arteriam, varils in locis visui occurrunt acini hepatis, & per vesiculam felleam repletæ arteriæ. Subiectum illud optimæ notæ.

N. X C I X.

Pedamentum continens frustum cutis juvenis, omni circumspeditione & in totum tunica cellulosa cum suis vasis sanguineis ablatis.

latis. Vasa sanguinea per cutem disseminata, conspiciuntur simplicem & eundem obtinere reptatum, objecto ab utraque parte viso: contra, si tunica dicta in totum à cute haud sit separata, tunc comparent vasa, & tunicam cellulosam gaudere reptatu ramorum arborum, cum cutis obtineat vasa reticulatim disposita: hoc objectum inspicendum per microscopium, cœlo sereno existente, idque luce averfa & à latere visum: præterea in hoc objecto, ita viso, occurrunt variæ exiles acini-formes particulae præsertim eo loci, ubi spinula à me intrusa est.

N. C.

Pedamentum & supra illud lien ovillus integer; repletio facta per arteriam ceraceâ materiâ flavâ.

N. C I.

Pedamentum & supra illud frustum lienis vitulini, cujus repletio facta per arteriam: acini hujus objecti evoluti sunt, ita ut tomentosæ extremitates in conspectum veniant, illud objectum, tam eximium, ut obstupefaciat spectatores.

N. C I I.

Pedamentum & c. segmentum magnum pulmonis humani, cujus repletio facta per venam pulmonalem: in ea repletionem vesiculæ pulmonales magna ex parte sunt repletæ, præsertim ubi spinulae binæ albicantes sunt intrusæ. Spinula nigra indicat faciem à me dictam cellulosam, ubi myriades vasculorum sanguineorum apparent.

A S S E R V.

N. C I I I.

Pedamentum & c. segmentum extremi penis virilis; in eo videri potest, glandem constare ex omnibus, id est, tribus corporibus nerveo-spongiosis, sicuti delineari curavi à plurimis annis in observat. meis Anatom. Chirurgicis.

N. C I V.

Pedamentum continens auriculam humanam summâ rubedine perfusam, propter repletionem arteriolarum. Observandum, naturalem constitutionem satis bene reservatam esse post balsamationem & indurationem; optimæ notæ est.

N. C V.

Phiala liquore repleta, in qua visui occurrit frustum placentaë uterinæ

16 T H E S A U R U S A N A T O M I C U S

uterinæ humanæ; quæ in totum redacta in hydatides, continentes liquorem aquosum, qui affectus à me nuncupatur hydrops placentaë uterinæ: de hoc affectu à plurimis annis scripsi & cum per icones expressi in observat. meis Anatom. Chirurgic.

In eadem phiala repræsentantur duo quoque frustra alterius placentaë uterinæ humanæ, cujus vasa per arterias replevi, ita ut videntur sese exhibeant ramificationes innumeræ, quarum ultimis extremitatibus omnibus in hydatides mutatis, non rarò integram ferè urnam, (*Emmer Belgicè*) vidi repletam; unde ejusmodi mulieres videntur gravidæ ex duobus tribusve foetibus.

N. C V I.

Pedamentum instructum segmento magno mesenterii ovilli; hujus arteriæ non solum, verum etiam venæ sunt repletae: suntque hujus objecti glandulae (ni fallor) nonnihil diversae ab iis, quæ in corpore humano reperiuntur, idque non solum ratione figurae, verum etiam particularum minimarum rotundarum, inter ramificationem horum vasorum: quales autem sint dictæ particulae, in posterum Deo volente explanabimus.

N. C V I I.

Pedamentum indicans portionem placentaë uterinæ humanæ, cujus vasa nitidissime sunt repleta. optimæ notæ est.

N. C V I I I.

Phiala liquore repleta, in qua substantia polyposa in formam membranæ è sanguine meo, à me facta, sola conquassatione. Hæc autem conquassatio facta per ramum juniperi Goënsis, quo facto, dicta substantia fibrosa firmiter sese applicuit dicto ramo, tanquam pseudo-membrana, quæ hic subnigra apparet, quamvis in principio alba fuerit.

N. C I X.

Pedamentum continens portionem pulmonis vitulini, folium arboris repræsentans, hujus arteriæ peculiari modo reptantes admodum sunt teneræ, & ad lucem (cœlo sereno existente) conspiciendæ.

N. C X.

Phiala &c. & in ea rete admirabile è capite vitulino, cujus arteriæ, dictum rete constituentes, sunt repletae; jure merito nomen illud competit huic objecto, cum neque ortum neque finem expiscari possimus.

C X I.

Phiala &c. continens Testiculum humanum nitidissime evolutum,

rum, superans omnes testiculos unquam à me evolutos; isthæc evolutio refert fasciculum crassum & magnum serici albißimi atque tenuißimi.

N. C X I I.

Pedamentum &c. frustum musculi furalis, in quo videre licet, quomodo extremitates ultimæ arteriolarum, ceraceam materiam effuderint in substantiam carneam, unde rubedinem acquisivit.

N. C X I I I.

Phiala liq. &c. segmentum cutis plantæ pedis, in eo comparent epidermis, corpus reticulare, cutis cum suis papillis nervæ ex Europea muliere, unde duo priora corpora eodem sunt colore, dependentque à cute ex parte avulsa & per fundum dispersa: cutis verò rubicunda à repletionem arteriolarum; hujus papillæ nervosæ tantisper prominent ex cutis superficie.

N. C X I V.

Phiala &c. frustum magnum Intestini Ilei humani adulti hominis; hujus vasa in totum sunt repleta, ita ut videantur inflammata; superficies interior, quæ Phialæ parietem respicit, nobis occurrit phænomenum vermiculorum exiguorum. Ramus objectum verius phialam comprimens est asparagus Africanus, tenui-folius, viminalibus virgis, foliis laticis instar ex uno puncto numerosis, stellatim dispositis. *Pluk. Amaltb. Bot.*

N. C X V.

Pedamentum & super illud frustum magnum diaphragmatis ex homine, cujus arteriæ nitidissime sunt infarctæ, non solum per partem musculosam, verum etiam per membranofam; horum reptatus quoque diversus.

N. C X V I.

Phiala in liquore reservans Intestinum Ileum recens nati; in eo conspiciere licet intestini susceptionem, id quod rarò contingit, in recens natis.

N. C X V I I.

Pedamentum continens frustum Intestini Ilei ex vitulo recens nato; repletio facta per venam cavam, cujus extremitates perquam tenues apparent. Objectum ipsum repræsentat, & quidem perfecte, ornamentum ex linteo carpo applicandum, quod Belgice audit *Ponjet*. Notandum, horum vasorum reptatus non convenire cum iis, qui occurrunt in homine.

N. C X V I I I.

Pedamentum cui insidet frustum mesenterii humani glandulis
C plu-

18 T H E S A U R U S A N A T O M I C U S

pluribus instructum, cujus repletio facta per arterias & tanta quidem dexteritate, ut in iis conspersa reperiantur corpuscula rotunda, acinos hepatis imitantia; hoc objectum optimæ notæ.

N. C X I X.

Phiala liquore referta, in qua continetur portio stomachi inversi, ut visui occurrant circumvolutiones, æmulantes circumvolutiones Cerebri humani. Repletio facta per arteriam.

N. C X X.

Pedamentum instructum naso humano, balsamo indurato, cui adhærent labium superius, gingivæ, ut & quatuor dentes; repletio facta per arterias, præterea cutis admodum rubicunda, pori per microscopium visibiles; reptatus arteriarum per cutem luculentissime non solum conspiciuntur, verum etiam per gingivas & prolabium, quorum integumentum non audit epidermis, sed verò epithelia, quandoquidem sub iis nulla quidem cutis, at verò textura papillarum sensibilium invenitur.

N. C X X I.

Lamella penis virilis transversim secta, ut non solum duo corpora nervco-spongiosa majora, verum etiam corpus nerveo-spongiosum minus vel urethræ in conspectum venient. Objectum optimæ notæ.

N. C X X I I.

Phiala liquore repleta, & in ea embryo ovillus uncie magnitudine à capillo dependens, idque in proprio liquore & membranis, qui liquor perspicuitatem non amisit.

N. C X X I I I.

Phiala &c. caniculus bicolor inter pedes anteriores embryonem cercopitheci Americ. continens, coloris subnigri, digiti magnitudine.

N. C X X I V.

Phiala &c. conservans stomachum foetus humani, cui lien & segmentum omenti annectuntur. Repletio facta per arterias; per omentum telæ araneæ instar tenue, reptant ramuli arteriosi omenti instar tenues.

N. C X X V.

Pedamentum &c. segmentum magnum Intestini jejuni. Repletio facta per venam & arteriam; hinc summà rubedine perfusum.

ASSER

A S S E R VI.

N. C X X V I.

Pedamentum &c. segmentum magnum lienis humani. Repletio facta per venam: hujus acini, qui diversi sunt ab iis, qui exstant in hepate, hic sunt tantisper evoluti.

N. C X X V I I.

Pedamentum &c. arteriæ repletæ è cerebro humani foetus. Hæ autem admodum teneræ, ita ut facillimè frangantur.

N. C X X V I I I.

. Pedamentum &c. Auricula cordis sinistra ex homine. Repletio facta per arteriam: hæc formam obtinet cristæ galli.

N. C X X I X.

Pedamentum &c. segmentum lienis humani, cujus arteriam ceraceà materiâ rubrâ replere decreveram: cum autem hoc ad votum non videretur evenire, replevi quoque venam materiâ ceraceâ flavâ, id quod optimè successit, & sic ex parte objectum rubicundum quidem videndum sese exhibet, sed verò maximâ ex parte flavedinem assumsit. Notandum interim quanta sit discretio inter vasorum constitutionem lienis humani, & quadrupedum. Objectum hoc bonæ notæ, ex muliere obesa, & ætate provectâ.

N. C X X X.

Pedamentum &c. segmentum pulmonis humani, cujus vasa sanguinea sunt infarcta ceraceâ materiâ rubrâ.

N. C X X X I.

Pedamentum &c. frustum stomachi infantis, cujus arteriæ mirum in modum sunt repletæ.

N. C X X X I I.

Phiala sicca, & in ea Intestinula foetus humani, horum arteriæ optimè sunt repletæ, & quod considerandum, Intestinula rotunditatem in totum conservarunt sine foveis.

N. C X X X I I I.

Pedamentum &c. apulstre confectum ex segmento Intestini Ilei humani: cujus repletio facta per venam cavam.

N. C X X X I V.

Phiala in liquore continens pædothecam infantis, quæ innititur segmento placentiæ uterinæ, cujus arteriæ sunt repletæ.

N. C X X X V.

Pedamentum &c. cor foetus humani, cujus repletio facta per arteriam, quæ repletio tam nitide perfecta, ut subtilissimæ extremitates in conspectum veniant; præterea visui occurrunt portiones trunci arteriæ magnæ, ut & arteriæ pulmonalis, nec non locus ubi hæ binæ coalescunt, qui dicitur ductus arteriosus.

N. C X X X V I.

Phiala in liquore continens segmentum arteriæ magnæ descendens, cujus lateri dextro connatum est segmentum ductus thoracici, à me ceraceâ materiâ rubrâ repleti ex muliere adulta.

N. C X X X V I I.

Phiala &c. segmentum magnum stomachi infantis, cujus arteriæ repletæ ad ultimum extremum, huic affidet ramus Lychnidis flosculis minutissimis foliisque gramineis.

N. C X X X V I I I.

Pedamentum &c. segmentum renis humani, cujus repletio facta per truncum venæ cavæ. Optimæ notæ.

N. C X X X I X.

Pedamentum instructum segmento magno Intestini crassi (ex muliere obesa) huic portio mesenterii annexa, ventilabrum repræsentat. Repletio facta per venæ cavæ ramum. Objectum itidem optimæ notæ.

N. C X L.

Phiala in liquore continens duos renes succenturiatos, quorum arteriæ sunt repletæ.

N. C X L I.

Phiala in liquore continens vermem per vias urinarias excretum, diversum ab aliis vermibus.

N. C X L I I.

Pedamentum &c. aplustre confectum è cute humanâ; repletio facta per arteriam, in eo innumeræ papillæ cutaneæ comparent, quæ aliis perperam glandulæ cutaneæ dicuntur.

N. C X L I I I.

Pedamentum cui imposita sunt intestinula foetus humani: repletio facta per arteriam, coli portione apertâ in conspectum venit gemina valvula coli, acu intrusâ patefacienda.

N. C X L I V.

Pedamentum & super illud salino simile, confectum ex intestino juvenis, cujus repletio facta per arteriam; hinc colore rubicundissimo præditum.

N. CXLV.

N. CXLV.

Pedamentum & supra illud vexillum confectum ex intestino jejuno hominis, cujus repletio facta per arteriam, unde summâ rubedine conspicitur.

A S S E R VII.

N. CXLVI.

Phiala liquore repleta, & in ea factus humani pes, sub cujus pede extremo reperiuntur spinæ echinomelocactos, cum inscriptione:

PER ASPERA, AD ASTRA!

Objectum vitæ speciem representans, à capillo dependet in liquorē. Repletio facta per arteriam.

N. CXLVII.

Phiala in liquore continens unam atque alteram vertebam colli, cum segmento medullæ spinalis è sectu humano, in medio medullæ spinalis conspicitur cortex, rubro colore præditus, qui nil, nisi vascula ex arteriis oriunda.

N. CXLVIII.

Pedamentum & supra illud segmentum magnum Intestini coli ex homine, cujus repletio facta per ramum venæ cavæ: horum ramulorum reptatus plane diversus est ab iis vasculis, quæ disperguntur per dictum Intestinum, si repletio facta sit per ramum venæ portæ.

N. CXLIX.

Pedamentum instructum sterno, cum cartilaginibus costarum & musculis intercostalibus, è sectu humano, repletio facta per arteriam, quæ optime successit. In hoc objecto ossicula sterni sunt bicomposita, id quod nunquam ostendi.

N. CL.

Phiala liquore repleta, & in illa duo segmenta placentæ uterinæ humanæ summâ rubedine perfusa, propter repletionem ad ultimum usque. Objectum optimè notæ.

N. CLI.

Phiala &c. frustum magnum placentæ uterinæ humanæ, cum segmento funiculi umbilicalis.

NB. Facies, quæ respicit phialam, adhuc obsita est involucre

molliori, quæ respicit uterum, & à chorio oriri videtur, saltem cum eo connectitur. Hinc palam esse existimo, vasa uterina, cum vasis placentæ immediate haud uniri. *Vid. Thesaur.* v. in eo fusius super hac re scripti.

N. C L I I.

Pedamentum &c. magna portio pulmonis vitulini, cujus vasa arteriosa ad ultimum ulque sunt repleta. Notandum interim reptatum horum vasorum discrepare ab iis, quæ reptant per pulmonem humanum, & quod per consequens nonnulli hallucinati sint, qui nobis repræsentarunt figuras ad brutorum objecta factas, sine admonitione debitâ.

N. C L I I I.

Pedamentum ex ligno Indico confectum, continens intestinula foetus humani, cujus arteriæ sunt repletæ: in ileo observandum Intestini diverticulum unciae magnitudine, in cujus extremo tres vesiculæ comparent capitula aciculorum repræsentantes. Id admodum rarum esse existimo.

N. C L I V.

Pedamentum &c. semi-ren ovillus, cujus vena repleta; in illa diversitatem observamus notabilem, inter hoc objectum & renem humanum.

N. C L V.

Catinulus confectus ex segmento Intestini Ilei humani inversi, & inflati, ut visui occurreret cellulositas quædam, quæ aliis habetur pro tunica cellulosa secunda; per hunc catinulum disseminantur innumeræ venulæ, præsertim à venæ cavæ ramis oriundæ, gaudentque reptatu diverso ab iis, quæ proveniunt à venæ portarum. Dictus catinulus in se continet frustum exiguum ferri, magnetis vim obtinens, & proveniens ex cruce ferreâ, desumpta è templo (novo dicto) civitatis Delphensis: hocce donum mihi misit Cognatus meus, reverendus D. *Henricus Ruysch*, Pastor vigilantissimus Ecclesiæ Reformatæ Delphensis, qui illud à famigeratissimo D. *Leewenboeckio* acceperat.

N. C L V I.

Pedamentum cui impositum est segmentum cutis humanæ, omni tunica cellulosa ademptâ, ut verus reptatus arteriosus spectantis oculos incureret. Illud enim aliquibus imposuit, qui cellulositatem vasculosam, & oleosam in totum non abstulerant, diversum reptatum ostendentes, existimabant cutem duum generum

rum vasa obtinere: eum in finem hocce præparatum conficere decreveram. Inspiciendum averſa luce, ut vasa luculentius appareant.

N. C L V I I.

Tibia & pes extremus infantis vitæ ſpeciem repræſentans, hiſce aditus eſt ramus balfaminæ maris Zeylanici fructu rubro minori &c. Objectum optimæ notæ in liquore conſervatum.

N. C L V I I I.

Phiala in liquore continens fructum cerebri foetus flaccidi vacuæ, in cujus utero hæſerat, mortuus per ſemi annum abſque putrefactione, non ſine flacciditate: & hoc etiam locum habere in mulieribus obſervo, modo uterus maneat clauſus, ut ſupra monui. Notandum interim me hocce objectum per arteriam repleviſſe, neque mihi obſteriſſe quod tamdiu foetus hæſerit in utero mortuus. Vide ſuper hac re ulterius decad. 3.

N. C L I X.

Pedamentum inſtructum patella humana, ſupra quam innumeræ arteriæ repletæ repunt, quæ haud pertinent ad patellam, ſed vero ad remanentiam tendinis muſculorum tibiam extendentis.

N. C L X.

Pedamentum & ſupra illud compositio variorum, quæ reperta ſunt in atheromate ſtomachi, ſc. os deforme, pili & quatuor dentes molares. Vid. ulterius hiſtoriam in decad. III. Teſtimonio munitam.

N. C L X I.

Phiala in liquore continens ſegmentum quadrupedis cum annexo crure & extremo pede ut & unguicula non fiſſa, ſed integra, quæ ſunt cum quatuor dentibus molaribus, oſſe diſſormi & pilis reperta in dicto atheromate.

N. C L X I I.

Phiala in liquore reſervans magnam partem mammæ mulieris; vitæ ſpeciem reſerentem; huius ſubſtantia neutiquam glanduloſa, ſed verò talis, qualis non datur in toto corpore, præterquam, quod aliquam analogiam habeat, cum paraſtatiſ humanis, ſcilicet tenaciſſima, albiſſima, & neutiquam evolventa: rotundæ particula, quæ in mammis reperiuntur, mera eſt pinguedo, cæteræ particulae rotundæ in papillæ extremo, capitis aciculæ minoris magnitudine papillæ mihi ſunt, quæ ſenſationem vel ſenſum ibi præſtant.

N. C L X I I I.

N. C L X I I I.

Phiala in liquore fibras musculares continens; sc. fibram atque alteram in plurimas fibras subtilissimas separaveram, quæ tomenti instar sunt tenues, quæ ut melius in conspectum venirent, addidi ramum pimpinellæ spinosæ: cum autem morâ fundum assolent petere fibræ, movenda est phiala: nam tunc diversæ spinulis adhærere coguntur.

N. C L X I V.

Pedamentum cui imposita est costa infantis ita incurvata, ut litteram C. repræsentet, hoc factum à me post macerationem in liquore acido.

N. C L X V.

Pedamentum &c. cor pueri balsamo induratum; repletio facta per arteriam, cujus ultimæ extremitates luculentissime conspiciuntur.

N. C L X V I.

Pedamentum &c. segmentum Intestini coli & Ilei ex homine; ubi notandum, colon, contra naturæ leges, admodum fuisse extensum, idque ab hernia intestinali, quam patiebatur, dum viveret; & hoc pluries me vidisse in herniosis memini. In hoc objecto observandum ulterius, sc. à flatu à me adactò, binas valvulas hic sese videndas exhibere, id quod in statu sano & naturali non fit in homine pancreaticæ vivente, tum enim ibi nobis occurrit orbiculus loco valvularum.

In affectu miserere mei à flatu oriundo, non raro quoque ita extenditur Intestinum illic, ut loco orbiculi compareant diestæ valvulæ. Sub puncto nigro in conspectum venit orificium processus vermiformis, qui processus non inflatus, secundum longitudinem segmenti coli hic repit.

N. C L X V I I.

Phiala &c. foetus ovillus exiguus cum secundinis, vitæ speciem repræsentans.

N. C L X V I I I.

Phiala &c. segmentum Intestini recti ex juvene, in eo comparent ita diestæ glandulæ, potius cryptæ Boerhaavianæ, quæ hic luculentissime comparent colore subrubro. Ramus objectum versus parietem comprimens, est acacia Africana spinis albicantibus.

N. C L X I X.

Pedamentum &c. Boopilus è stomacho vaccæ, albus & magnus.

N. C L X X.

Pedamentum &c. vesicula fellea humana, ceraceâ materiâ infarcta; hic apparet tortuositas ductus vesiculæ felleæ humanæ, quæ in brutis recto ductu, ut plurimum decurrit.

N. C L X X I.

Phiala liquore referta, & in ea segmentum stomachi vitulini, ut & papillæ nervosæ, à quibus dependet corpus reticulare cum papillarum thecis.

N. C L X X I I.

Pedamentum &c. segmentum magnum mesenterii cum suis glandulis, quæ quamvis exiles, optime tamen sunt repletæ, ut illarum arteriolarum reptatus in conspectum veniat. Præterea luculenter & copiose apparent vascula per mesenterii substantiam dispersa. Ex homine.

A S S E R VIII.

N. C L X X I I I.

Pedamentum &c. frustum cutis capitis magnum ex juvene, cuius arteriæ nitidissime sunt repletæ, & inter se conjunctæ.

N. C L X X I V.

Phiala liquore repleta, & in ea pia mater rubicundissima, (propter repletionem) tanquam inflammata: hæretque inter ramum Juniperi Goënsis.

N. C L X X V.

Pedamentum &c. magna portio Intestini Ilei ex homine adulto; in ea nobis occurrit suscepcio dicti Intestini, ubi apertura à me facta & puncto nigro notata, ut illa distinctius appareret.

N. C L X X V I.

Pedamentum &c. segmentum linguæ vitulinæ secundum longitudinem factum: repletio facta per arteriam. In eo comparent papillæ linguales, & quod notandum, in sui medio epitheliam abstuli, ut arteriarum reptatus clarius apparerent. Vide punctum magnum à latere positum; averâ parte autem, ubi superior pars est abscissa, æque bene videmus reptatum vasorum, ac in superficie, id quod mirandum.

N. C L X X V I I.

Pedamentum &c. segmentum magnum intestini coli, cujus repletio facta per arteriam; longe alium reptatum exhibet, quam si facta fuisset per venam, id quod considerandum.

D

CLXXVIII.

N. CLXXVIII.

Phiala in liquore continens segmentum lienis vitulini, cujus arteria est repleta. Membrana ab unâ facie adempta, levem insitui evolutionem, (excarnationem, uti dicitur) & hoc in totum non est vituperandum, sed multo distinctius in liene post repletionem, indurationemque reptatus mihi apparet. Ramus, cui insidet objectum, est, Nerion angustifolium odoratum.

N. CLXXIX.

Pedamentum &c. continens duo objecta, quorum supremum portio est Intestini Ilei ex homine, hujus repletio facta per venam portæ, suntque ramusculi innumerabiles, tenuitatem telæ araneæ superantes; spinæ extremitas acuta, faciem externam intestini indicat, altera spinula bicolor perfodit tunicam cellulosam, quæ hic extensa & repleta materia ceraceâ rubrâ, & hinc tantus tumor.

Alterum & infimum objectum est apulstre ex segmento Intestini Jejuni confectum. Repletio facta per arteriam: in hoc objecto omnia jura (valvulae conniventes dicta) plana nobis occurrunt.

N. CLXXX.

Pedamentum &c. segmentum diaphragmatis magnum. Repletio facta per arteriam. NB. Arteriæ per diaphragmatis partem tendinosam, ut & membranosa reptantes, peculiari gaudent reptatu, & diverso ab iis, quæ disperguntur per partem musculosam.

N. CLXXXI.

Pedamentum continens unum ex minoribus dentibus, maximi piscis marini, (Belgice *Potvis*, aliis *Cajjellor*) s. cete, è cujus capitis parte posteriore colliguntur aliquot dolia cerebri vel cerebelli, illudque purificatum perperam vocatur sperma ceti.

N. CLXXXII.

Pedamentum instructum segmento anteriore capitis vitulini. Repletio facta per arteriam. Cum autem hoc objectum variis usibus destinatum sit, ea propter vasorum diversitas hic quoque reperitur circa structuram, & sic arteriæ per palatum disseminatæ non conveniunt cum iis, quæ dispersæ sunt per buccas, multoque minus, quæ in cavitate ossis frontis exstant; si quis ulterius indagaverit vasa longiora mucum narium producentia vel conficientia, & ex arteriis prodeuntia in distis animalibus (loquor de illis vasis, quæ repunt per ossa spongiosa narium) ô quanta discretio! Denique si quis linguam vitulinam, ut oportet, ceracæ

ceâ materiâ repleverit, postea secundum longitudinem in duas partes dissecuerit, reperiet omnium vasorum reptatum æque bene, ac si integram linguam perlustraverit, id quod non observatur in liene, hepate, renibus & aliis corporis humani partibus. Hisce omnibus ita constitutis, nemo dixerit, hæc omnia à creatore benignissimo tam diversimode esse condita, nisi ad sui manifestandam inpercrutabilem potentiam & gloriam.

N. C L X X X I I I.

Phiala in liquore continens sceleton pruni albi, cujus vasa succosa dictum fructum constituentia, discrepant ab iis, quæ pyrum constituunt, & quod mirandum, hujus pruni vasa partim prodeunt ex vasculis pedicelli, partim ex lapide.

N. C L X X X I V.

Pedamentum instructum glandulâ parotide è capite vitulino recens nato; repletionem per arteriam factâ, videre est, quanta sit discretio inter reptatum arteriolarum hujus glandulæ, & mesenterii humani glandulas; & hoc certum est indicium, omnes glandulas in unum idemque à Benignissimo Creatore non esse destinatas, nec solum sanguinem ducentes, aut sanguiflua vasa esse vide super hac re Decad. III. Adversar.

N. C L X X X V.

Pedamentum &c. segmentum stomachi humani. Repletio facta per arteriam. Notandum hæc vasa gaudere diverso reptatu, ab eo, qui conspicitur in Intestino Jejunio, unde concludendum, aliud opus, aliud instrumentum.

N. C L X X X V I.

Pedamentum &c. segmentum penis virilis, in quo tunica cellulosa enormiter extensa à flatu adacta; & quam tenuis sit cutis hujus partis hic potest videri.

N. C L X X X V I I.

Pedamentum &c. semi-ren humanus. Repletio facta per venam. Vide locum ubi spinula tricolor intrusa est. Bonæ notæ.

N. C L X X X V I I I.

Pedamentum &c. apulstre confectum ex segmento pulmonis ovilli. Repletio facta per arteriam, cujus extremitates telam araneorum longe superant tenuitate.

N. C L X X X I X.

Pedamentum &c. apulstre ex chorio vitulino. Repletio facta per arteriam, cujus extremitates tomenti instar tenues sunt, repantes quoque peculiari modo.

D 2

N. CX.

N. CXC.

Phiala in liquore continens foetum humanum quatuor circiter mensium à conceptione, hic capite declivi & corpore inverso decumbit inter omentum humanam nitidissimum.

N. CXCI.

Pedamentum &c. semi-ren juvenis, cujus arteria repleta. Optimæ notæ.

N. CXCI I.

Pedamentum &c. acetabulum vitulinum. Repletio facta per arteriam & venam.

A S S E R I X.

N. CXCI I I.

Pedamentum &c. vexillum magnum confectum, è cute humana, in qua innumeræ papillæ cutanæ comparent.

NB. Has papillas constare non ex singulis, sed vero ex plurimis ramusculis nervorum, id quod luculentius apparet in cute papillarum mammarum balænæ, sicuti delineari curavi in The-saur. Anatom. I.

N. CXCI V.

Pedamentum &c. Placenta integra foetus humani imperfecti; hujus repletio facta per venam. Objectum optimæ notæ.

N. CXCV.

Pedamentum instructum superiore parte capitis foetus humani, cujus vascula arteriosa per piam matrem disseminata, optime repleta sunt, ut & illa dispersa per duram matrem.

Notandum præterea, cranium pluribus in locis deficere, id quod pluries vidi, & tali in casu, cerebrum nonnihil prominere per omnes ejusmodi defectus, vasa arteriosa, quæ hic addidi, sunt arteriolæ repletæ & admodum teneræ ac fragiles.

N. CXCV I.

Phiala in liquore conservans brachium pueri, vitæ speciem representans, in cujus manu continetur foetus humani ren rubicundissimus, propter repletionem per arterias.

N. CXCV I I.

Pedamentum &c. magnum mesenterii humani segmentum, in quo variæ glandulæ comparent, objectum ita præparatum brassicam crispam representat.

N. CXCVIII.

N. C X C V I I I.

Phiala in liquore continens perperam dictam molam: cum mola nil aliud sit, quam placenta post editum foetum ex utero residua, idque à compressione uteri, ut denuo recuperaret naturalem magnitudinem. Hoc objectum vix ovum magnitudine æquans, remansit à foetu quatuor circiter mensium.

N. C X C I X.

Phiala &c. Testiculus humanus evolutus, & dispersus per ramum Juniperi Goënsis, ut luculentius admiranda vasorum tenuitas in conspectum veniret.

N. C C.

Phiala &c. sceleton, vel vasa succosa mali Armeniaci (*abricos* vulgo) quæ partim ex calculo, seu lapide, partim ex pediculo prodeunt, suntque longe diversa, quæ pyra constituunt.

N. C C I.

Pedamentum &c. musculus biceps ex juvene, cujus arteriæ sunt infarctæ.

N. C C I I.

Phiala in liquore &c. segmentum placentæ uterinæ, repletionem per arterias factâ; hic in extremis arteriis adhucdum conspicitur pulpositas arteriolarum.

N. C C I I I.

Pedamentum &c. frustum magnum Intestini Jejuni, cujus junctura, (valvulæ conniventes) repræsentant rotas molares aquaticas.

N. C C I V.

Pedamentum &c. genu ex homine, in eo apparent duæ cartilaginee mobiles, quæ notantur duobus punctis albis. Spinula sub patella intrusa, denotat corpus glandulosum ab auctoribus ita dictum. Punctum nigrum notat patellam. Repletio facta per arteriam.

N. C C V.

Pedamentum durâ matre instructum pileoli instar expansa, in qua sinus longitudinalis apertus remansit. Processus falciformis adhucdum remansit æque ac in statu naturali. Notandum præterea, repletionem esse factam per arteriam, sed vero nil materiæ ceracæ intravit sinum longitudinalem; imò id nunquam fieri existimo, nisi venularum extrema conjunxerint sese arteriolarum extremis, alias id nonnunquam offendi.

N. C C V I.

Phiala &c. segmentum cuticulæ, corpus reticularis, & cutis.

balenæ; spina elevat cutem à corpore reticulari, ut in conspectum veniant papillæ cutanæ albissimæ, & quod ulterius considerandum est, corpus reticulare & epidermis colore sunt mar-moreo, id quod sæpe fit, ut mihi relatum est à piscatoribus balenarum.

N. C C V I I.

Pedamentum & c. superior pars Cranii foetus humani, cujus dura mater tam nitide & fixe affigitur adhucdum interiori parti cranii, ut nusquam ab ea sit dissoluta, præterea arteriæ per duram matrem dispersæ, tantâ dexteritate sunt repletæ, ut aliquibus in locis exiùm quæfiverit ceracea materia in substantiam ossicam instar roris. Vide puncta nigra variisque aliis locis, tale quid me nunquam hisce locis vidisse, confiteor.

N. C C V I I I.

Pedamentum instructum osse tali & calcis, portione cutis & pinguedine. A latere conspiciendam sese dedit portio tendinis, sum-mâ rubedine perfusa, propter articularum repletionem.

N. C C I X.

Pedamentum & c. segmentum epidermidis & corporis reticularis balenæ, super epidermidem affixa sunt animalcula, quæ pediculi balenæ audiunt, suntque hi facile admiranda. Pedes sunt armati unguiculis acutissimis, aduncis, quibus hic inter se firmiter cohærent.

N. C C X.

Pedamentum & supra illud unum ex ossibus frontis, quod adhucdum albissimum visui occurrit, idque è foetu humano qui per integrum annum, & quod superat, in corpore remanserat sine putrefactione, solâ flacciditate oblitus, & tandem è corpore materno prope umbilicum excisus est anno 1722. mense Augusti per Chirurgum versatissimum Petrum Plaatman, matre superstite, & in hunc usque diem pancreaticæ vivente. Hanc Historiam, & quod ad eam attinet, iustis testimoniis confirmatam posthac (volente Deo) describemus.

Præterea in hujus Theſauri cavo inferiore ſequentia quoque conſpiciuntur.

A. PYxis, & in ea magnum ſegmentum meſenterii humani, cujus glandulæ petreſactæ.

B. Pyri, ni fallor, petroſelini vulgo dicti, ſkeleton. Illud radiis ſolaribus expoſitum conſpicitur conſtare ex myriadibus vaſculis ſuccoſis, quorum extrema pulpam connexam reſervarunt. Dictum obiectum in liquore reſervatur, & in fundo Phialæ reperi-
tur planta Gundelia dicta *Tourn.*

C. Skeleton foetus humani nitidiſſimum, decumbens in tumulo ex ligno Indico conſectum, idque ſupra matrarium ex ſerico cœruleo conſectum, inter manus oſſeas continet foetus humani inſteſtinula nitida, quorum arteriæ ſunt repletæ.

D. Skeleton foetus humani quatuor circiter menſium à conceptione, eodem modo ornatum, & per tumulum mentiuntur volare aliquot ephimerides, ea inſcriptione:

EADEM, QUÆ VITAM DEDIT, HORA CARPSIT.

E. Pes extremus mulieris, propter repletionem arteriarum colore ſanguineo, ceu inflammatus, ab omni parte, perfectiſſime repletus; Epidermis verò ſupra digitos remanſit albiſſima, cum nihil commercii habeat cum vaſis ſanguineis.

F. Phiala, & in ea ramus Elichryſi Afric. arborei, ſalviæ folio odorato. *Boerhaav.* Hujus folia pulchre obſita polypo à me ex ſanguine bovino recens macſtato ſola conquaſſatione conſecto. Obiectum optimæ notæ.

G. Superior pars cranii humani, pericranio ob omni parte obducta, hujus arteriæ tam nitide ſunt repletæ ut ſumma rubedine emineat.

H. Fruſtum oſſis femoris hominis adulti, cujus ſubſtantia quæ in nobis perquam dura, calamumque ſcriptorium craſſa, à prægreſſo morbo unciæ craſſitudinem, obtinuit, & quod magis mirandum, in totum cellulosa vel ſpongioſa eſt facta, an ab inveterato & prægreſſo œdemate?

Expli-

Explicatio Figurarum.

T A B. I.

PYri, ſkeleton ita præparatum, ut luculentiffime viſui occurrat pyra præcipue ex vaſculis ſuccoſis cum ſuis extremis pulpoſitatibus conſiſtere: præfertim dico, quandoquidem internus ita dictus uterus hic non apparet.

A. Pedicellus.

B. Corticis reſiduum.

C. Vaſa ſuccoſa cum ſuis extremis pulpoſis extremitatibus.

D. Particulæ aciniſormes, rotundæ, quæ in variis pyris inveniuntur, quarum nonnullæ in lapideam ſubſtantiam degenerant, ſuntque diverſæ formæ in variis pyris.

T A B. II.

Segmentum membranæ chorii vitulini, cujus vaſorum repletio facta per venam umbilicalem. Quam mirandus ſit horum vaſorum reptatus, ut & quam diverſus ab aliis venis ſit, in hoc Theſauro maximo cerni poteſt.

Notandum quoque harum venarum extremitates non in pulpoſam, ſed vero in tomentofam ſubſtantiam hic variis locis exire, id quod ubique feciſſent, ſi repletio facta fuiſſet perfectiſſima: diverſis attamen locis hic videre eſt, venarum extrema tenuitatem telæ aranearum ſuperare.

T A B. III.

Segmentum Intefſtini Ilei cum portione meſenterii è corpore humano, ventrilabrum repræſentans.

A. Segmentum meſenterii, per illud diſperguntur venæ cavæ portiones, quas replevi ceraceâ materiâ rubrâ, ex iis emergunt ramificationes tomenti inſtar tennes, peculiari reptatu gaudentes, an ob diverſum, quem obtinent uſum?

b. b. b. Portio Intefſtini.


TAB. I



Utricularia alba L.



TAB. II



Calluna ul. aquatica, fruct.

TAB. III

